

- राष्ट्रपति द्रौपदी मुर्मू आज जैसलमेर वायुसेना टेशन ऊँ देशी लड़ाकू हेलीकॉप्टर प्रचंड मांय उड़ान भरी-राष्ट्रपति पोकरण फील्ड फायरिंग रेंज मांय भारतीय वायुसेना रो युद्धाभ्यास-वायुशक्ति देख रही है।
- प्रधानमंत्री नरेन्द्र मोदी रो काल अजमेर ऊँ विकास री 16 हजार 600 करोड़ रुपया ऊँ बत्ता खर्च वाळी परियोजनावां जनता ने सूपण अर नुवी परियोजनावां रा काम री नींव रखण रो कार्यक्रम।
- केंद्रीय मंत्री गजेंद्र सिंह शेखावत कह्यो-भारत रा रक्षा ऊँ जुड़्या साज-ओ-सामान देश मांय ई बणावण रा बूता मांय सुधार व्ह्यो।
- मुख्यमंत्री भजनलाल शर्मा कह्यो- राजस्थान प्रौद्योगिकी, डिजिटल गवर्नेंस अर स्टार्टअप रा हलका मांय देश मांय अगाड़ी राज्य रा तौर ऊँ सामी आ रह्यो है।

000

राष्ट्रपति द्रौपदी मुर्मू आज जैसलमेर वायुसेना टेशन ऊँ देशी हल्का लड़ाकू हेलीकॉप्टर प्रचंड मांय उड़ान भरी। वे ग्रुप कैप्टन नयन शांतिलाल बहुआ सागे करीब 25 मिनट ताई प्रचंड री उड़ान मांय रही। ई दौरान हेलीकॉप्टर प्रचण्ड जैसलमेर रा किला अर गढीसर तळाव रा ऊपर ऊँ निकळ्यो। उड़ान पाछे राष्ट्रपति आगंतुक पुस्तिका मांय माण्ड्यो के ई हेलीकॉप्टर मांय उड़ान भरण ऊँ वां ने देश रा रक्षा बूता री जाणकारी मिली है। वे भारतीय वायुसेना अर जैसलमेर वायुसेना टेशन री टीम ने बधाई दीनी। राष्ट्रपति पोखरण मांय भारतीय वायुसेना रो वायु शक्ति अभ्यास ई देख रही है।

000

प्रधानमंत्री नरेन्द्र मोदी रो काल अजमेर दौरा रो कार्यक्रम है। वे कायड़ विश्राम स्थली ऊँ संवारे करीब साढ़े ग्यारह बज्यां विकास री 16 हजार 680 करोड़ रुपया ऊँ बत्ता खर्चा वाळी परियोजनावां रा काम री नींव रखेला अर पूरा व्ह्या काम जनता ने सूपेला। श्री मोदी बांदीकुई-जयपुर एक्सप्रेस-वे, अमृतसर-जामनगर अर दिल्ली-वड़ोदरा एक्सप्रेस-वे रा न्यारा-न्यारा हिस्सां रो उद्घाटन ई करेला। प्रधानमंत्री जोधपुर शहर मांय खंभा माथे बणायी जावण वाळी सड़क रा काम री नींव ई रखेला। वे पीवण रा पाणी री नोनेरा अर परवन-अकावद परियोजनावां ऊँ जुड़्या न्यारा-न्यारा कामां री ई सरूआत करेला। श्री मोदी सूरज री रोशनी ऊँ बिजली बणावण वाळा हलकां ऊँ बिजली दूजी ठौड़ भेजण सारू ट्रांसमिशन सिस्टम ई जनता ने सूपेला अर पांच सब-स्टेशनं रा काम री नींव रखेला। ई मौके प्रधानमंत्री देश री 14 साल उम्र री टाबरियां मांय सर्वाइकल कैंसर री रोकथाम सारू एचपीवी टीका लगावण रा अभियान री ई सरू करेला। श्री मोदी राज्य मांय नुवी नौकरी लागण वाळा 21 हजार 800 ऊँ बत्ता नौजवानां ने नौकरी लागण रा कागजात ई सूपेला। प्रधानमंत्री रो जनसभा ने ई संबोधित करण रो कार्यक्रम है।

000

प्रधानमंत्री नरेन्द्र मोदी कह्यो है के प्रौद्योगिकी आधारित सुशासन ने बधावो देवण सागे देश रिफार्म एक्सप्रेस माथे सवार है। वे आज **“विकसित भारत के लिए प्रौद्योगिकी, सुधार और वित्त”** मुद्दा माथे राखी ज्यी बजट पाछे री वेबिनार मांय बोल रह्या हा। प्रधानमंत्री कह्यो के सरकार कानी ऊँ प्रक्रिया ने आसान बणावण अर कारोबार करण ने सरल बणावण ऊँ आ उपलब्धि हासिल व्ही है।

.....

श्री मोदी कह्यो के सुधार री गति बणायी राखण सारू नीतिगत इरादां सागे नीतियां ने बेहतरीन तरीका ऊँ लागू करण माथे ई ध्यान देवणो जरूरी है। वे ए.आई., ब्लॉक चेन अर डेटा एनालिटिक्स काम ले र साफगोई, गति अर जवाबदेही बधावण माथे जोर दीनो। प्रधानमंत्री कह्यो के लारला दस साल मांय सरकार बुनियादी ढांचा विकास माथे खास ध्यान दीनो है, ज्यीं कारण सार्वजनिक पूंजीगत खर्च मांय लगातार बधोतरी करी जा रही है।

000

शिक्षा मंत्री धर्मेन्द्र प्रधान कह्यो है के एन.सी.ई.आर.टी. री किताब मांय न्यायपालिका मांय कथित भ्रष्टाचार रा बारा मांय पाठ शामिल करणो दुर्भाग्यपूर्ण है अर सरकार ई मामला ने गंभीरता ऊँ ले रही है। खबरनवीसां सागे बातचीत करता थकां श्री प्रधान कह्यो के एन.सी.ई.आर.टी. ने अ सगळी किताबां पाछी लेवण अर रद्द करण रो हुकम दे दियो ज्यो है। ई मामला माथे दुःख जताता थकां श्री प्रधान कह्यो के शिक्षा मंत्रालय, सुप्रीम कोर्ट रा हुकम री पालना करेला।

000

केंद्रीय संस्कृति अर पर्यटन मंत्री गजेंद्र सिंह शेखावत आज जोधपुर रा केंद्रीय शुष्क क्षेत्र अनुसंधान संस्थान—काजरी मांय राख्यी ज्या किसान सम्मेलन मांय शामिल व्ह्या। वे कह्यो केन्द्र सरकार श्री अन्न री उपज अर वां ने काम लेवण ने बधावो देवण सारू लगातार काम कर रही है। इण ऊँ पैली खबरनवीसां सागे बातचीत करता थकां वे कह्यो है के भारत री सामरिक ताकत बधी है अर रक्षा ऊँ जुड़्या साज—ओ—सामान देश मांय ई बणावण रा बूता मांय सुधार व्ह्यो है। श्री शेखावत कह्यो के भारत पैली दूजा देशां ऊँ हिफाजत ऊँ जुड़्या साज—ओ—सामान री खरीदी करतो हो जद के अब वो अ सामान दूजा देशां ने बेचण री ताकत राखण लाग्यो है।

000

मुख्यमंत्री भजनलाल शर्मा विधानसभा मांय बजट माथे व्ही चर्चा रो आज जवाब दे रह्या है। वे कह्यो के चर्चा रे दौरान सदस्यां कानी ऊँ दीरीजी राय खास है अर सरकार वां रा बारा मांय और जाणकारी करावेला। मुख्यमंत्री सदन ने बतायो के लारला दो साल मांय 91 योजनावां रा काम मांय लारली सरकार रा कामकाज री तुलना मांय बत्ती प्रगति व्ही। वे कह्यो के राज्य मांय लारला कांग्रेस राज री तुलना मांय मौजूदा राज रा 2 साल रा कामकाज मांय राज्य री सकल घरेलू उत्पाद—जीडीपी रेट बत्ती रही है।

श्री शर्मा कह्यो के लारला दो साल रे दौरान प्रदेश री आमदनी मांय ई बधोतरी व्ही। मुख्यमंत्री आं आंकड़ां ने प्रदेश री बरकत री बुनियाद बताया।

000

मुख्यमंत्री भजनलाल शर्मा कह्यो है के प्रौद्योगिकी, डिजिटल गवर्नेंस अर स्टार्टअप रा हलका मांय राजस्थान अगाड़ी राज्य रा तौर ऊँ सामी आ रह्यो है। श्री शर्मा आज जयपुर मांय 'राजस्थान सी—साइड स्टार्टअप समिट—2026' मांय बोल रह्या हा। वे कारोबारियां ऊँ प्रदेश मांय निवेश करण री अपील करता थकां कह्यो के सरकार प्रक्रियावां ने आसान बणायी है अर ईज ऑफ डूइंग बिजनेस माथे खास ध्यान दियो जा रह्यो है। मुख्यमंत्री कह्यो के आई—स्टार्ट रे मार्फत प्रदेश मांय 3 हजार 450 ऊँ बत्ता स्टार्ट—अप काम करण लाग्या है अर राजस्थान नेक्स्ट जेनरेशन रिफॉर्म्स सारू स्टार्टअप्स विकसित कर्या जा रह्या है।

मुख्यमंत्री सेमीकंडक्टर पॉलिसी—2026 अर एयरोस्पेस एण्ड डिफेंस पॉलिसी—2026 रो जिक करता थकां कह्यो के आं रे जरिये कारखानां रा विकास ने तेजी मिलेला। श्री शर्मा बतायो के 'राइजिंग राजस्थान' रा तैत मिल्या 35 लाख करोड़ रुप्या रा निवेश प्रस्तावां मांय ऊँ 8 लाख करोड़ रुप्या रा प्रस्तावां ऊँ जुड़्या काम सरू व्हे ग्या है। वे कह्यो के राजनिवेश पोर्टल रे जरिये मिल्या 49 हजार करोड़ रुप्या रा प्रस्तावां ने मंजूरी दीरीजी है। ई मौके मुख्यमंत्री स्टार्टअप चलावण वाळां सागे ई बातचीत कीनी।

000

बालोतरा जिला रा पचपदरा थाना हलका मांय नेशनल हाईवे नम्बर—25 माथे सरवड़ी कने आज बस अर ट्रेलर री टक्कर रे कारण व्ह्या हादसा ऊँ दो बच्चां समेत छह जणां री मौत व्हे ग्यी। हादसा मांय दस ऊँ बत्ता लोग जख्मी व्हे ग्या, ज्यां ने कने रा अस्पताल ले जायी ज्या जठे ऊँ आठ जणां ने जोधपुर रैफर कर दिया ज्या। बस जोधपुर ऊँ बालोतरा ओड़ी जा रही ही। पुलिस अर प्रशासन मौके पूग र राहत रा काम सरू कराया अर आवण—जावण बहाल करायी ज्यी।

000

उत्तर पश्चिम रेलवे होळी ने ध्यान राखता थकां 35 गाड़ियां रा 273 फेरा करावण रो फ़ैसलो कीनो है। ई सागे ई पैली ई चलायी जा रही 30 खास गाड़ियां रा 216 फेरां री मियाद बधायी ज्यी है। 53 नियमित गाड़ियां मांय न्यारी—न्यारी श्रेणियां रा 141 डिब्बा ई जोड़ी ज्या है। अ गाड़ियां जोधपुर, श्रीगंगानगर,

उदयपुर अर जयपुर ऊँ गोखपुर, ऋषिकेश, हावड़ा अर मुंबई सारू चलायी जावेला। प्रशासन जनता ऊँ रेलां माथे रंग या फूकणां नी फैंकण अर ज़रूरी टिकट ले र सफर करण री अपील कीनी है।

000

भ्रष्टाचार निरोधक ब्यूरो आज जयपुर मांय भू-अभिलेख निरीक्षक अनिल कुमार ने 3 लाख 80 हजार रुपया री घूस लेता थकां पकड़ लीनो। आरोपित अहलकार शिकायत करण वाळा ऊँ वां री पुश्तैनी ज़मीन रा बंटवारा री एवज मांय पांच लाख रुपयां मांग्या हा। सत्यापन पाछे वो 1 लाख रुपया खुद सारू अर तीन लाख रुपया उपखंड अधिकारी, जयपुर-प्रथम सारू मांग्या। एसीबी आरोपित अहलकार ने गिरफ्तार कर र जांच सारू कर दीनी है।

000

प्रदेश मांय आज सिरधा भाव सागे रंगभरी ग्यारस मनाई जा रही है। ई सागे ई फाग री मस्ती ई निजर आवण लागी है। पर्यटन विभाग री ओर ऊँ डीग मांय राख्या जा रह्या ब्रज महोत्सव मांय रंगा-रंग सांस्कृतिक कार्यक्रम पेश कर्या जा रह्या है अर होळी रा रसिया गाया जा रह्या है। ई साल पद्म श्री ऊँ नवाज़ा जावण वाळा भपंग बजावण वाळा गफरुद्दीन मेवाती आज कार्यक्रम पेश कीनो। दूजी कानी पाली रा मिंदरां मांय पूजा-अर्चना करी ज्यी अर भजन गायी ज्या। आवता दिनां आवण वाळा त्यौहारां रे दौरान शांति-व्यवस्था बणायी राखण सारू सगळा जिलां मांय पुख्ता बन्दोबस्त कर्या जा रह्या है।

000